

**Tunup sineriaani qilalukkanik qernertanik kisitsinissap piniartunik piffinni ilisimasaqarluartunik peqataatitsisup 2022-imi aallartinnissaa pillugu Naalakkersuisut peqquneqarnissaannik Inatsisartut aalajangiiffigisassatut siunnersuut.**  
(Inatsisartuni ilaasortat Harald Bianco aamma Knud Mathiassen, Inuit Ataqtigiit)

**Naalakkersuisut Nunatta kangiani qilalukkanik qernertanik piniartut ilisimasaannik atuilluni kisitseqqissaqullugit peqquneqarnissaannik inatsisartut aalajangiiffigisassaattut siunnersuut. Kisitseqqissaarneq siunissami nunatta kangianut pisassiisarnermut tunngaviliissaaq.**  
(Inatsisartuni ilaasortaq Lars Poulsen, Siumut)

### **Akissuteqaat**

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

### **Siullermeenera**

Siunnersuutit saqqummiunneqartut pillugit Naalakkersuisuniit qujavugut.

Suliniutissat tamarmik piujuartitsisussamik ingerlanneqassasut, Naalakkersuisooqatigiinnissamut isumaqatigiissummi allaqqavoq. Ataatsimoorluta pisuussutigut innuttaasunut tamanut iluaqutaasumik atorluarneqassapput. Naalakkersuisooqatigiit isumaqatigiissutigaat, pisuussutitsinnik uummassusilinnik misissuinerit qaffanneqassasut, tamannalu uummassusilerisuniit aamma piniartuniit, taakkulu ilisimasaanniit aallaaveqassasut isumaqatigiissutigalugu.

Tunumi qilalukkanik qernertanik atorluaaneq ilaatigut atlantikup avannaata imaani uumasunut miluumasunut ataatsimiititaliarsuup NAMMCO-p siunnersuineranit tunngaveqarpoq. Siunnersuineq uummassusilinnik misissuinerit tunngaveqarpoq, ilaatigut qilalukkanik qernertanik qaammataasakkut sumiissusersuinerit, timmisartumiit kisitsinerit, najukkani ataasiakkaani piniartunik apersuilluni paasiniaanerit, oqaluttuarisaanermi pisarineqartartunut paasissutissat aamma sananeqaatinik misissuinerit ilaatinneqarlutik.

Pinngortitaleriffik Tunumi timmisartumiit qilalukkanik qernertanik kingullermik 2016-imi aamma 2017-imi kisitsivoq. Pinngortitaleriffik Ittoqqortoormiit eqqaanni timmisartumiit kisitsinissamut aningaasanik 2022-mi upernaakkut immikkoortitsivoq. Kisitsinissaq taanna NAMMCO-p inassutigaa. Kisitsinermi siunertarineqarpoq, Ittoqqortoormiit eqqaani upernaakkut pisarineqartartut, nunami aasaanerani allanngutsaaliukkamiittartuunersut paasineqarnissaa. Tunumi timmisartumiit qilalukkanik qernertanik 2022-imi kisitseqqinnissamut isumalluutissanik maanna immikkoortitsisoqannilaq.

Tunumi aqutsiveqarfinni pingasuusuni qilalukkanik qernertanik immikkut aasaanerani kisitsineq 3,1 millioner koruunit atorlugit ingerlanneqarsinnaasoq, Pinngortitaleriffiup missingersorpaa. Tassani najukkani ataasiakkaani piniartut peqatigalugit ataatsimiinnerit pilersaarusiormi aallarniutaasut aamma najukkani piniartumik ilaqarluni timmisartumiit kisitsinissaq ilaatinneqarlutik. Najukkaneersummi ilisimasaasa ilanngunneqarnissaat aalajangiisuulluinnartumik pingaaruteqartut, Naalakkersuisut isumaqarput. Taamaattumik Naalakkersuisut misissorniarpaat uummassusilerisut qilalukkanik qernertanik kisitsineranni piniartumik tamatigut peqataatitaqartarnissaq pillugu piumasaqaammik aalajangersaasoqarsinnaanersoq.

NAMMCO-mi Ilisimatusarnernut Ataatsimiititaliaq 2019-imi novembarip qaammataani isummerpoq, Tunumi qilalukkat qernertat ima ikilisimatigisut, allaat ukiumut ikittuinnaat pisarinqartaraluartut nunap allanngutsaaliukkap kujataani qilalukkat qernertat ikileriaqqissinnaasut. Tunumi uumasooqatigiit pingasuusut arlaannaalluunniit pisaqarfigineqaqqissinnaanngitsut, aammalu inassutigaat sumiiffinni pingasuusuni qilalukkanik qernertanik piniarnerit tamarmik pilertortumik matuneqassasut, Ilisimatusarnermut Ataatsimiititaliaq inerniliivoq. Aalajangiiffigisassatut siunnersuut maannatut iluseqarluni akuerineqassappat, aalajangiiffigisassatut siunnersuummut aningaasalersuinissaq 2022-mut Aningaasanut Inatsit pillugu isumaqatiginninniarnernut ilaatinneqarnissaa, Naalakkersuisunit suliniutigineqassaaq.

Taama oqaaseqarluta aalajangiiffigisassatut siunnersuutit akuerineqarnissaat Naalakkersuisunit inassutigaarput.